


Premio Antón Risco de Literatura Fantástica

2022

«O imaxinario é un mundo
tan mundo como o
mundo real»
Vicente Risco



A Fundación Vicente Risco, Deputación de Ourense, Librería Aira das Letras, Pastelería Fina Rei, Livraria Traga-mundos e librería Punto e Coma convocan conxuntamente o «VII Premio Antón Risco de Literatura Fantástica», co fin de homenaxear o escritor e teórico da literatura alaricano Antón Martínez-Risco Fernández. Continuador do gusto do seu pai polo fantástico, don Vicente Risco (a quen podemos considerar introdutor do xénero fantástico na literatura galega coa obra *Do caso que lle aconteceu ao Dr. Alveiros*, en 1919), Antón Risco foi un profundo teórico da literatura fantástica con obras como *Serpentáguila (Notas de un lector de poesía)*, Quebec (Canadá), Ediciones Hipogrifo, 1986; *Literatura fantástica de lingua española (Teoría y aplicaciones)*, Madrid, Taurus, 1987; *Viaxes á América Latina á procura de literatura fantástica*. Sada (A Coruña), Edicións do Castro, 1987. Tamén cabe destacar o seu labor de editor en *Antoloxía da literatura fantástica en lingua galega*, Vigo, Galaxia, 1991. Tamén foi un prolífico escritor de novelas e relatos fantásticos, moitos deles aínda inéditos.

Por tal motivo, e co fin de continuar o seu labor de divulgar o xénero fantástico, convócase este premio conforme as seguintes

BASES:

PRIMEIRA: Poderá concorrer a este premio calquera persoa que presente escritos inéditos da súa autoría redactados en lingua galega ou portuguesa, cunha extensión mínima de 150.000 caracteres con espazos e máxima de 600.000.

SEGUNDA: O prazo de entrega remata o día 28 de febreiro de 2022. Os orixinais deberán ser remitidos á FUNDACIÓN VICENTE RISCO, RÚA SAN LOURENZO 3, C.P. 32.660 ALLARIZ, (Apartado de Correos 21 –Allariz) por correo postal CERTIFICADO, sen que consten no exterior elementos de identificación do/a autor/a.

TERCEIRA: Os orixinais presentaranse en formato PDF gravados en calquera soporte físico (CD, pendrive ou calquera outro análogo), maquetados en formato DIN-A4, en letra ARIAL de corpo 12 e a dobre espazo.

Calquera orixinal entregado sen cumprir os requisitos de forma (tipo e corpo de letra, espaciado...) será automaticamente descartado.

Os orixinais, veñan en CD ou pendrive, irán acompañados dun sobre fechado que conterá a identidade do/a autor/a (nome completo, enderezo postal, teléfono e correo electrónico) e o título definitivo da súa obra, facendo constar no exterior só o título ou lema da mesma.

CUARTA: A obra gañadora será premiada con 3.000,00 € (suxeitos ás retencións fiscais pertinentes) e a publicación do libro. A FUNDACIÓN VICENTE RISCO CO SEU SELO EDITORIAL DR.ALVEIROS será a encargada da súa edición e publicación podendo establecer acordos con algunha editora portuguesa co fin de facilitar a súa difusión no suposto de que a obra gañadora estea escrita en portugués.

QUINTA: O xurado estará composto por cinco persoas. Unha delas fará as funcións de secretaria ou ben a organización designará outra que as faga. Neste último caso, non terá voz nin voto.

SEXTA: Se a calidade literaria das obras non fose estimábel, segundo o criterio do xurado, o premio poderá declararse deserto.

SÉTIMA: A contía do premio considérase en concepto de anticipo polos dereitos de autoría, polo que as entidades organizadoras se reservan o dereito de publicación da primeira edición da obra gañadora en lingua galega ou portuguesa. A persoa premiada, recibirá gratuitamente 25 exemplares da obra publicada e na adquisición doutros exemplares contará cun desconto do 50%. Se os dereitos de autoría xerados polas vendas superasen a contía do premio procederase a liquidar periodicamente os mesmos como é costume no sector editorial. Asemade, a persoa gañadora do premio será convidada a formar parte do xurado na seguinte edición.

OITAVA: As entidades organizadoras resérvanse o dereito a facer público, xunto co fallo, os lemas das obras finalistas cuxa publicación recomendase o xurado, mais sen abrir a plica, para respectar así o anonimato. As/Os autoras/es das obras mencionadas que así o desexen poderán pórse en contacto coas entidades convocantes para trataren o tema da publicación.

NONA: Os orixinais que non resulten premiados serán devoltos aos seus autores e autoras no caso de o solicitaren por escrito antes de rematar o mes seguinte á decisión do xurado.

DÉCIMA: O fallo do xurado terá lugar en Allariz, na sede da Fundación Vicente Risco, durante o mes de maio de 2022, e será publicado nas redes sociais da FVR (Facebook, Twitter e Instagram).

DÉCIMO PRIMEIRA: A participación neste premio leva de seu a aceptación das presentes Bases, así como a decisión do xurado, que será inapelábel.